



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**48. Kalenderwoche – ab 23. November 2008**

## Oh, Danneboom!

Nee, es is nischd zu machn, de Weihnachtszeit riggd gnadnlos nähör. E ganz deidliches Zeeschn is ja bei uns in Gemnidz - dor Danneboom offm Margd! Vorschn Sonnahmd hammse dähn offgeschdelld. Isch bin grade in dor Schdadt gewähnsn. In dor Glosdorschdraße - da sinn bledzlich zwee Bollezeior mid Modorrädor un Blaulischd in dor Fußgängerzone offgedauchd. Ganz langsam sinse gekomm. Im erschn Momend dachde isch schon, die machn Bummschdreife, aber dann habbsch gesähn, dass die sozusachn als wie e Begleidschudz eim großn Dieflador vorneweggefahrn sinn. Damid de Leide Bladz machn. Off dähm Dieflador lach e riesischor Weihnachtsboom. Ja, genau ehm dähr, dähn se offm Margd dann offgeschdelld hamm.

Hinnor dähm Dieflador kam dann es großes Granaudo, dann noch zwee Gleendrandsbordor mid Arbeitsgräfde, dann noch e Lasdor un am Ende nochma Bollezei mid Audo.

So ähnlich muss das sein, wennse de Gasdorbehäldor irschendwo dursch de Gäschnend dransbordiern dun. Vorne Bollezei, hindn Bollezei...

Guhd, in die Gasdorbehäldor is ja Adom drinne, Das is nisch ganz ungefährlich. Abor e Danneboom... - wesvorwäschn da de Bollezei...?

Wobei - es kennde nadiehrlich sein, dasses so millidande Danneboomgäschnor gähm dud, die sisch villeischd vor dähn Dieflador schmeißn wolln. So griene Umweldschidzor, die gäschn de Abholzung von eim Danneboom brodesdiern wolln? Das kennde sein. Un dann dud dähr Danneboom nisch offm Margd ankomm. Un wenn dähr dann ewisch in dor Glosdorschdraße rumlieschn däde - samd Dieflador -, das däde ja dann dähn ganzn Betrieb offhaldn.

Wobei isch, ährlich gesachd, noch nie was von so millidande Danneboomgäschnor geheerd hab. Ja, von Boomschidzor so allgemein schon! Da duds ja die gähm, die de Beeme im Räschnwald schidzn wolln. Warum wolln die eische ndlich nisch ooch Dannebeeme im einheimischn Wald vor dor sinnlosn Abholzung schidzn?

Isch meene, wenn jedes Nese alleene in Sachsn sisch een Danneboom offm Mardbladz offschdelln dud, da is das ja beschdimmd schon e kleenor Wald. Un wensde dann das ma so bundesweid zusammreschnen dusd... das sinn dausende von Beeme! Un das sinn alles scheene un majesdädische Egsemblare! Se solln ja off de Märgde e bißl was härmachn! Da kannsde keene gleen Kimmorlinge nemm! Un das is dähn Boomschidzorn egal?

Hm, isch hab de Beeme eischendlich lieber im Wald. Abor es is ehm eene Dradidsjohn. Da kannsde ooch als Freind von de Beeme nischd machn. Da kannsde bloß hoffn, dass die Beeme hinnorhähr eenor sinnvollen Vorwärdung zugefiehrt wern. Die Kimmorlinge von Weihnachtsbeeme die mor in dor Wohnschdube had, die wern ja sähr ofd abgefaggl. Nee, das darf mid die scheen großn Dannebeeme nisch bassiern!

**Eduard Sachsenmeyer**